



康對山先生文集

第四冊

^ 16
2796
4



門 16
號 2796
卷 4

康對山先生文集卷之六

後學

同邑孫景烈孟揚選次

長白瑪星阿景謙叅閱

王應槐兆三

邑後學耿性直伯正校張書紳公佩分校

何瑞雲卿

碑

野田先生碑

先生姓韓氏諱福字德夫其先天長人也始祖宗哲
有才畧元末嘗為長興侯賓客覘見太祖知天命有

昭和十九年
六月十八日
晦末

聖山文集 卷之六
所歸旣而去之曾祖從戎關中世籍西安前衛祖
瑛生父鐸鄉試舉人累官茂州知州茂州娶趙氏生
先生後以先生貴贈茂州爲知府趙爲恭人先生幼
而穎慧長而超拔以成化辛丑進士除知滑縣嚴已
正法滑用大治旋以憂去百姓戀戀若失慈母後除
知章邱治悉如滑三年徵爲四川道監察御史巡按
宣大舉劾明允時望是歸陞大名知府知府八年再
入覲朝廷以其治平爲天下第一錫宴吏部觀者盈
道皆爭覩韓大名曰重生包老云陞淞江布政司叅
政方去則轉大理寺右少卿奉敕總理直隸軍務馬
政後陞都察院右僉都御史巡撫保定等處地方弭
盜安民今尠其比復命總督蘇松糧儲未幾又命回
院管事時劉瑾方執事忤瑾下錦衣詔獄三月始釋
後陞戶部左侍郎凡有會議先生惟以是非所在持
論天下陰受其福者多矣俄命兼左副都御史整理
湖廣糧儲方綜理間值廟堂以遼東屯田清查失實
於是又改命先生往遼東時瑾率以指授先生惟不
如指故瑾益怒先生遂免官歸此正德四年七月事
也先是先生在湖廣夤緣者賂瑾則以先生封皮北
行後一年瑾伏誅竟以湖廣封皮坐累謫戍固原至

今上卽位始赦還西安前衛在田二十四年康彊無恙自檢益嚴士大夫庶民小子親就先生如有弗逮春秋八十有一躍馬省耕捷於少年語稱仁者壽先生非邪 治乙丑冬予北上會先生於邢臺其議論皆極當世之務綜理曲折無在不獲予始物色先生治大名事其先有司嚴保甲教樹藝諸事則政得樞要故每行必準璽書所謂政平訟理吏畏民懷古之循良莫能及也斯實錄矣張孟獨撰先生行狀言大名事甚詳蓋有見之言非徒設也壬辰八月丁丑先生卒十一月己未合葬於吳恭人之窆禮也先生之

孫生員詢長安佳士也予宿重之光宗嗣美當在若人因詢請爲先生之碑故畧載行事系之以辭庶考德者不厭其繁而步武者能思其要辭曰維先生世之偉人厥藏允厚行方物憚位大弗究豈時命之使然抑在我之何咎木塔新阡兆同元媾履不愧心宜爾遐壽子孫振振具美且秀慶佑自天益遠益懋考德采休視在華胄

明封承德郎吏部文選清吏司主事馬公墓碑 治時海事敬皇帝歌湖馬子應祥以進士歷知河內歛而聲聞達於京師洎徵入爲稽勲主事則與鄠

人王九思及海爲友道誦古昔則法先王一時名大
夫莫之能先焉毅皇帝初應祥迎其大人封主事公
於官邸九思與海日趨事焉聞其論覩其容質而有
文簡而適理淵乎若深矢乎若直浩乎若不可量蓋
古之遺德也正德庚午予罷翰林嘗遨遊三輔之間
考往蹟眺名里數獲拜公於堂乙亥之冬公乃以疾
捐賓客矣嗚呼痛哉世有哲人爲民軌則乃不能俾
之永享遐筭使賢者承其式不肖者易其故豈非風
俗之不幸哉往者應祥以海爲公墓碑海不敏嘗得
君子之教於心久矣茲安可辭於是述公之行事於

碑曰公姓馬氏諱倫字宗彞先世蓋高苑人祖道原
孔武有力洪武時從秦王就國後調西安左衛故子
孫世爲西安人而居萊市里中道原生六子其第四
子昇配戴民生公少而孤以卓犖自負馬氏故多俠西
安人或多畏之公獨耻之曰丈夫當以信義則於鄉
人何區區若是者故西安人咸曰宗彞長者不可不
修問也公素愛畜產而家或弗豐於是以所有易馬
貨之卽能裕用不乏已而復自笑曰財取足用而已
役役於此不亦苦乎後亦棄絕不爲公天性慷慨好
義急人之難無避水火實非利一錢者河州衛指揮

金冕有急使人挾二百金將有所遺而使館公家金未及遺而使者留金於公以去死於塗三年公自費予之封識如故又一千戶某亦河州人自京師來至西安有罪亡去以一囊盛百金留公所亦久弗取公又自贖予之其封題猶金氏云故兵部尚書河州王公居家不妄通賓客顧獨喜與公接又遣與其諸子遊公舊字修道王公以爲不協於義以宗彝更之自爲說以贈公王公嘗謂公曰反金事不難俾數年出金以息所得蓋不細矣而封識不移此正其所難耳王九思曰王公振古之英社稷之臣也重公如此君

子於是因有以覘知公矣故西安諸學士大夫鉅人長者無不愛慕公願與公遊非苟然同俗也公事母戴夫人誠孝曲至夫人以貞節自誓而公能承顏奉歡老壽被旌顯於井疆有榮耀焉西安人嘗論述公之行事謂公性快直無論尊貴人洎能受與不能受輒面道其是非人猶有怒也公隨已忘之又輒與好處之不紀其過以此人愈益敬公故私相勉勵唯恐有聞如此也公生景泰戊午十二月二十四日壽蓋七十有八先配安人王氏其先灤州人陽和衛百戶林之孫伯父榮以才畧改西安左衛署鎮撫父貴偕

其兄來關中因以安人有女德歸公云善事戴夫人
得其歡心而公之嚴毅能無逆志則其貞順之性蓋
有人人之所難矣壽六十有一卒生男子二人長卽
應祥累官山西按察司副使次應昌嗣於公德女子
三人殷富張嵩李蕃者壻也而嵩爲河南府同知云
孫男子五人平咸寧縣學生中千辛午孫女子三人
長嫁指揮襲子周邦圻死改適千戶夏浹次適長安
學生楊宗輝季未嫁死曾孫子二人女子一人苗裔盛
矣繼娶王氏亦先卒又繼杜氏公卒之二年丁丑三
月七日與王安人合葬樂遊原新塋又七年海始撰

碑刻諸墓左嗚呼公之遺德顧此何能詳者然有求
知公德於千百世之下者其或可考於茲云爾辭曰
惟馬孟父世篤其慶爰值其祥迺克有生是惟封公
惟馬之光桓桓高苑建此有宅克綏關輔俾壽而昌
孫子以強姓右宗亢服此令名故墓累而崇根培而
茂德之不爽音之不戕母謂奚當嗣於按察其光益
長萬夫之望樂遊之阡永惟公嘉元堂闕闕神道克
廣南山是瞻從以孫子胡不萬年

封儒林郎翰林修撰呂公墓碑

公諱溥字某家世高陵人也其始祖曰世昌又幾世

至彬卿生八八生興興生貴貴生鑑鑑娶魏氏生公
及其弟博公長子柎者海友也海以柎友則數之高
陵因得數拜公親見其容貌聞其言論觀其行事知
公之宜有柎也公以正德丙子五月十六日卒於家
七月九日葬於縣北祖塋當時柎以海爲公墓碑海
懼匪德不能昭述盛德揚著幽光故至於今始勉復
於柎焉夫人子於所生者生也莫不欲其榮歿也莫
不欲其哀言語行誼莫不欲其傳然虛誇鮮實人指
議至矣尚奚言傳哉故海之自矢也不憂天下之不
信吾言而憂吾言之不足以自信夫公鄉里恒人無
麗辭輝藻以要譽文學無豐財崇職以驚炫流俗無
奇節詭行以聳世習然海數言不置非所以私其所
好也示天下以長者之道所以廣教布德懲勸浮靡
也海惟公朴實不華耕鑿飲食之外一無所爲海不
敢輕誣之曰遜世不仕也孝親友弟守身畏法處親
戚鄰里無所欺負治生期於僅足責人不爲已甚雖
傳記所載典冊所訓何弗啻哉此公之大畧人人易
言之人人不能爲者故君子素其位而行不願乎其
外君子無入而不自得焉若公者於此道庶幾否耶
公美髯鶴幹望之如神仙達識事體深計者莫能會

其意其指揮是非談述理義學者或鮮焉志稱其決
魏某詐嚇李縣判之事豈非其事實哉墨劉之鬪墨
嘗謀醜其老病以償劉矣片言之間卻醜已鬪生墨
氏長少蓋幾人也其後又解姪婦之死平劉李之怨
訟買田逋稅者官不能稽諸板冊以公一言而決縣
官定徭役辟於里書方伯至亦信以去公言諸富平
道中方伯卽歸以正之其已壯哉公居常惡衣糲食
休休自娛旣受封貴顯猶着補綴履繩布終其身無
怨恫於人少日以天戶輸餉榆林同輸者爲掩昧得
貲皆笑公歸無完履乃同輸者發覺易子破產公獨
安居闔闔至今應輸者必自戒飭曰慎不可亡若呂
公閒居嘗謂柎曰汝知仕之大本矣乎無他慎取與
爾有餽者無故而餽豈無所爲也輒令反之寢疾經
兩歲柎晝夜侍不敢少怠或履聲稍震猶厲色以責
曰汝侍天子側亦當爾邪病且革呼柎語曰汝受朝
廷榮寵他日當竭力報國無得自便宜谷稟汝叔而
行公所以愛其弟者死猶未已也曩聞高陵人言公
壯時父命爲居室將於弟異公乃擇大木爲弟室弟
讓公公曰安知爲爾室也室成乃率以與弟配宋氏
潘府教授宋公之孫女也宋公愛其孫不欲與凡子

李州判者宋公之友也公十五卽爲李所器曰此大美弗興若身當與若子孫故宋公因以孫妻公當其時諸宋薄公貧也李君曰渠稍長豈止如爾家後其言卒驗云宋安人旣配公奉其家範事舅姑處如壘各得其道諸呂內外無弗悅者柟之少也安人壹是以身教之凡枕輦刺繡故事必曰此賢此孝講說大義亶亶不倦又恒誦其祖教授公之遺行以詔柟故柟之所以爲天下之士者其父母之教有然也公生正統戊辰五月十四日春秋六十又九安人與公同生七月二十一卒治乙卯五月八日壽止四十九有八正德癸酉三月一日以柟封公爲儒林郎翰林院修撰贈宋氏爲安人繼室侯氏亦封如安人焉子三人柟舉正德戊辰進士第一官翰林修撰爲上經筵講官仲曰梓公葬後五年歿季曰栖縣學生志弗忝兄二十一歲死女一人嫁劉孟陽孫子三人田縣學生甸柟子留梓子孫女三人嗚呼其傳盛矣銘曰維呂氏世懋德蘊靈尚父啓齊爰有高陵世昌孔武孫子是刑及彬卿父高陵以興至於六葉封君乃生纘此懿德厥宗用成篤生我友維邦之植直義廣孝公志斯承昔在壬申拜公於庭望之則嚴卽之則平

溫恭易簡若蘭之馨匪德曷永匪言孰明享不盡孝
德不媿齡遠近悲悼况云我情高陵之北實惟廣坳
建爾元宅萬世之寧考光摘耀因勒斯銘

明奉直大夫南京吏部清吏司署郎中雙流縣

學教諭胡公墓碑

公諱士濟字澤民秦安人也曾大父鈞自某州徙居
秦安豐財厚德人咸讓之生子海幼有大志未售乃
躬耕於南坳之野休休然若將終身蓋古沮溺者流
云子璉善文辭累舉不第仕為南陂知縣平以近民
嚴以懲傲盜不涉境蝗不害稼民用乂安九載吏部
方以為良欲登用之顧懇疏乞歸有詔嘉其去就特
許之道過南陂士民攀送者相望於道若失慈母雖
傳記所稱且何以加焉生男子七人長士源次士清
次士溫次士潔次公次士洪什加縣知縣次縣學生
士淳公生而穎異幼有大志獨為南陂公所鍾愛及
游縣學與其弟俱以朱氏詩稱名關隴聞岐山張君
精朱氏詩偕往學焉得其傳以歸大為提學副使浮
梁戴公所稱然累舉不利遂貢於太學方將友天下
之士以卒其業值其配李宜人以病卒京師不得已
仕成都縣學訓導至成都教其諸生立方起情士用

不與貧者捐廩卹之賴以成立者甚多有高文質者蜀邸人與藩臣某交後某得罪蜀王逮及文質公詣王言文質無罪王卽釋文質一時撫按藩臬皆禮重之乃又令署資陽縣教一如成都職滿成都人士攀送者諸縉紳於元都諸官寮於雲臺諸士人於昭覺諸弟子於新都觀者羣相歎息謂所稀覩至今猶美談焉陞鹽亭縣教論尋以內艱復除雙流仍以教成邠者教其諸生彬彬乎與他縣異兩受臺檄攝其縣事民殊以爲便已且人人自勵惟恐弗馴無面見公所謂有恥且格非與正德戊辰子纘宗以進士高等詔刻其策命爲翰林院檢討明年己巳公惟雙流職滿致仕歸秦安戊寅以纘宗封公爲奉直大夫南京驗封清吏司郎中先配李繼趙皆宜人今上卽位詔百官父母旣受封贈者其服色同子時纘宗知安慶府故又加公以四品服焉其生可謂榮矣嘉靖壬辰四月壽八十又四卒於家纘宗以山西布政使奔喪歸已而徒跣來武功請爲公碑以樹之墓道海嘗於姻友張用昭氏得聞公之懿德若歸蒲銘之金於子與憫盜驟者之欲悔其過而未逮數事宜其子孫振振翼翼亢宗述德有如吾纘宗君往歲海嘗獲侍公之

杖履望其容接其論逾於所聞多矣備極榮養安享
高年謂樂只君子福履綏之正公之謂乎李宜人國
子監生玘之女有淑德宜於公卒時年三十又二蓋
成化丁未也公生男子四人長卽纘宗次正宗次可
宗次在宗纘宗初以檢討謫嘉定判官陞童川州知
州乃有南京吏部之命尋知蘇州歷湖江山西山東
布政司叅政乃陞今職文章政事蔚然名世正宗以
下皆學待舉思齊厥兄女子三人長歸通判孫述先
次歸義官董瑩季歸高第孫男子七人初禘被祕秩
初祖皆讀書力學孫女子一人尚幼未聘其允昌矣
海與纘宗友善義不可辭銘曰惟胡仲父其德克崇
食不似德其後乃豐粵惟伯子靡受弗庸郁郁翼翼
爲時文宗光承帝賚尚弼丕功南垌之兆厥墳窿窿
配以伉儷終古是同刻銘表墓用述休風

先公墓碑

先公諱健字自強上世河南固始人始祖諱政始徙
來居武功長寧生子諱廷瑞爲元興化學官關中學
士大夫尊之爲西原先生西原先生生子六諱世睦
者生子二諱珙者生子諱汝楫初爲縣學訓導辟爲
燕府官後出爲安岳令太宗皇帝旣靖難召爲北京

行部左侍郎賜璽書留北京輔皇太子凡北京事從
所自行後上累以論功當侯則固辭不受卒六年上
乃召其子諱爵與禋至曰昔侍郎有三子今何二子
來諱爵對曰先臣中子年以賈出外不得奉詔上乃
以諱爵爲上林監正禋監副而賜年千金鎰數十千
貫敕所在毋稅關津吏毋得詰察至仁宗皇帝時侍
郎始贈爲資善大夫工部尚書而後諱爵累官至中
議大夫贊治尹南京太常寺少卿少卿取夫人李氏
生先公始先公生時先尚書方在行部一日太宗皇
帝召先尚書諭曰聞先生生有孫此可慰老景矣已
命左右記待長時錄用報先生今宜與先生賀乃賜
宴及馬匹鈔幣若干又賜國師輪子曰善保護善保
護先公生五年而先尚書卒及壯也又隨先太常居
南京先太常卒也英宗皇帝復大寶召錄先尚書子
孫而先公以詔至送吏部見部尚書則由部甬道入
又長揖部尚書不拜也尚書大夫怒欲竟不與官職
部尚書不肯曰此太宗皇帝所故命而上以報尚書
者乃請與通政司知事俾以祿奉祠尚書焉先公爲
知事歸也又二十年病痿不履痿三年也乃不起夫
人袁氏浙江按察司僉事溥女柔順有則宜於先公

生子五人長曰予先君鏞次曰銓又次曰錫曰鑾曰錦先公以已抱負濶大不得施設自見而家世膺受國社又厚也於是日日躬自督課使五子各自治經舉進士故予先君卒時懇懇言先公謂予小子海及諸昆弟之小子當廣志意成聞人以報先公卽否亦當必舉進士夫先公形貌修偉隆準而背聳言言沈厚有則宜大貴於世施設其抱乃淹晦之其終身至於予先君昆弟猶扃閉不發此其蓄何不厚也而乃如此曷也人嘗言先公通達世務雖古之名實者何不方也其孝弟忠信質直亮毅者何弗訓也文章稽古之事辭賦曲藝之細曷非可傳也然而終其身淹也斯惟予小子海日夜痛心亦終其身而不能忘也今小子海方圖永久於先君然宜先公之事故據述舊聞鑿諸堅石辭曰粵惟康氏世沐休祥裔本西周衛叔建邦纘戎承允適有烈光惟多令德固始是張洎宋中葉遷此長寧鼻祖丕奮奕葉斯昌五世慶積東里乃生輔弼文宗宇內用襄功大不有五十而亡辭彼茅土世遠逾芳太常是嗣其聲煌煌兄弟竝躍大啓厥康迤及我祖昭德彌長事業天嗇孫子惟良似續無忝配於周京履義秉節克光有明若珠在

澤若熹在堂有目咸睹奚動不臧永惟祖德思念曷
忘唐山之阡左右若防元寢宥密可奉幽藏刻碑述
德世萬其承

康氏第一子德瞻墓碑

第一諱阜字德瞻先君平陽府君冢子也幼善穎悟
強記能於詞賦詩人之事年十有九歲暴病卒先葬
近郊西原以多雜葬者廼今改縣北鳳岡之麓銘曰
瘞矣而遷維以子安胡不萬年

墓表

明進階光祿大夫南京工部尚書李公墓表

公諱善字宗元家世隴州人也高祖公賜高郵縣知
縣配范氏生惟中以子昇貴贈浙江道監察御史而
封其配某氏爲太孺人昇累官至浙江按察司副使
配苟氏傅氏俱封孺人生子溥卽公父也太學生
爲某倉大使以公貴封廣西道監察御史配馮氏封
孺人公少磊落負氣及長就學已浸浸有時名中成
化丁酉鄉試明年戊戌第進士拜行人司行人能不
辱使命擢南京廣西道監察御史清理廬鳳淮陽軍
伍滌弊省誣人於今誦之 治戊申有外艱辛亥改
浙江道監察御史巡按遼東多所舉劾將吏不法者

悉奏黜之遼東還陞河南按察司僉事值張秋河決上遣內外重臣提督塞河知非公不可於是悉以委公卒至底績上甚嘉之因陞俸一級以內艱改湖廣僉事值荆襄賊何淮等作亂淮自爲剗平王而其徒至數百人子女財帛所過一空道路阻絕公召指揮呂高等諭議建策賊衆悉擒事聞上命陞俸一級已而妖人熊彥和等作亂僞號已定陰相應附者數萬人公命呂高等亟捕彥和等數人坐法而焚其應附人名籍人心用安與侈功倖償者異矣於乎仁哉已未陞山東按察司副使兵備臨清邏姦按僞時以爲難甲子陞山西按察使持平慎法吏民畏之正德丙寅陞四川右布政使尋轉左祛弊政節公財察軌運衡重輕悉稱蜀民賴焉蜀故爲番戎所寇而某番尤盛鎮巡請命將征勦而太監羅籥與公計事謂非兵十萬不可公曰師出十萬日費千金民困歲歉公私俱竭恐邊事未平而內變復起柰何且番酋已知朝廷用兵勦罪恐懼無以自計若遣人宣布德意宜必從之果不從然後舉兵未晚也於是遣王玉等入番宣諭諸酋歛服其長悉從玉來獻甲以降誓永爲良民捷奏上大喜賜大紅織金衣一襲白金十兩尋陞

南京都察院右副都御史會考察京官公揚清激濁
輿論允協俄陞南京刑部右侍郎而用法平慎凡事
多稽援故事洎事定衆方服公長者有見云若盜冊
人王真是其一也其事載公家集茲不載庚午陞南
京工部尚書正規省費先後所無有勅命公提督修
理孝陵并懿文殿宇公量工聚財深有計度厥功垂
成會有疾懇乞歸致上竟允之歸十有三年爲嘉靖
元年奉恩詔進階光祿大夫有司備綵幣羊酒問勞
於家人咸榮之又三年乙酉秋八月癸丑卒於正寢
距其生正統甲子四月乙酉春秋八十有二夫人周
氏華亭教諭遷安周公之女先公卒其懿行自有志
傳側室鮑氏劉氏皆貞淑類周云公有男子四人守
經周夫人出錦衣冠帶總旗七品散官娶唐氏亦先
公卒守純州學生聘閻氏娶劉氏守綬娶梁氏守維
聘馬氏娶韓氏俱國子生三人者皆劉出女子四人
長適典科閻傲周出次適鳳翔張珂又次適舉人閻
佳皆鮑出季適千戶白豸劉出孫男子五人塘州學
生娶閻氏珙聘閻氏瑤瑄俱幼孫女子二人長聘
閻鑿次聘王化民守純卜以是歲閏十二月辛巳葬
公北原合周夫人之兆持叅議閻子明狀乞海有以

表公之墓嗚呼公之名德鬼然在人居官居鄉無非可師乃奄忽傾逝前輩典刑後將焉賴然茲但以稍述公之行事世次使後之觀者知爲公墓而已顧一笏之石豈足以盡載曰懿德哉海以鄉里晚生辱教有年今公已矣回視世稱達尊長者諄諄懇懇汲引後進復有幾人如公也於乎傷哉公子守經雖不幸早死而嗣德履孝公卿之子亦鮮儷矣守純勤學廣志克綏先猷其進靡度而守綏守維皆爾雅自好裕然俱良公之心復奚恫哉今孫子彬彬繁衍昌大揆之古昔蓋龔疏所無也不亦盛乎不亦盛乎

明故文林郎大寧縣知縣許君墓表

君諱諫字廷言家世陝州靈寶人也高祖仕信曾祖實皆世抱潛德祖聚爲安定教諭有厚德大學教人不倦安定人至今感慕立祠祀焉生三男子以季子襄毅公之貴贈戶部侍郎其長曰通卽君父也配何氏生君與其兄誼君天資剛毅幼從季父襄毅公學領朱氏詩遊縣學卓有時名九試不第治庚戌應貢入太學其志愈力然竟不合於有司也於是以國學監規不均及鄉學稅價太重上言於朝或以爲將獲罪於人君不恤也甲子拜清河縣知縣克新其政

諸廢具舉當道者殊以爲能後以戚里莊田坐繫詔獄改知臨晉君曰爲民獲罪雖死不恨况改近地乎君至臨晉則慎法禁嚴偷薄民大悅服未幾以外艱歸服除改知大寧大寧俗尚朴畧少文君又以文雅飭其政治更稱善偶病淋乃棄官歸徜徉梓里者十餘年敦族厚倫人無間言嘉靖乙酉三月二十一日卒由生正統己巳十二月十四日春秋凡七十又七云初娶李氏生女一適國子生鄭鍾繼娶王氏生女二長適李辰次適主簿張珍三娶王氏無出四娶呂氏生子三人僑修備側室楊氏生子四人佶仲儼作女二人長適散官張天祿次適李繼恩而僑修佶仲儼皆縣學生可以嗣君休德矣孫子三人福安薛安某安孫女七人尚幼未聘於乎予昔與君弟今學士廷綸侍郎廷美同遊翰林每及其家世則恒述君修德砥行之事謂君因心孝友然試雖不獲第於科目而三令大邑俱有良名亦可以少畢其志矣予子栗娶君妹婿布政使楊君叔安之子則君從甥婿也此來靈寶君弟茂才廷陳率君諸子以狀洎志銘授予請予表君之墓道志言君撫故兄子价偉僕倬如已出雖老年寢疾言及二親與季父襄毅未嘗不流涕

於枕其居常又以立身處家之道告戒諸子諸子若
 僑佶等又皆學文修行將俱大售於時為世令人君
 之所以教於家者視所以施之官秩曾少異哉予南
 至號畧訪函谷故蹟過梁村望及君墳突然與君先
 公之墳相翼蓋百世之安也其子孫興盛繁衍孰謂
 無所自乎夫前人以德昌庇其後後人益求其德行
 其昌庇之福引而益長緝而益光則許氏之世雖百
 世可也於乎僑與諸弟尚其勗之哉

邑後學

張廷梅與松
 孫 燮午卿 校字

康對山先生文集卷之七

後學

同邑孫景烈孟揚選次
 長白瑪星阿景謙叅閱

王應槐兆三

邑後學耿性直伯正校張書紳公佩分校

何 瑞雲卿

墓志

明故承德郎戶部貴州司主事閻君墓志銘

君諱倬字允章號山泉子太子太傅兵部尚書恆齋
 公之季子也世為隴州人曾祖秀未仕祖璿宣德乙

對山文集 卷之七
卯舉人歷仕南充嶽陽昌邑廣昌濟源教諭俱以太
傅貴贈通議大夫都察院右副都御史配王氏贈淑
人生二子長仲實以進士起家累官吏部考功員外
有盛德鉅名所爲詩成化 治間海內爭誦之予爲
諸生時嘗辱其與進蓋歐陽文忠之流焉次仲字卽
太傅公雅量宏度雖在顯順而厥施罔究武廟臨御
之初固已兆有所尼之漸矣先配夫人仲氏生三子
儒佑傳繼配夫人袁氏生二子俸及君君幼穎異不
凡袁夫人夢鳳鳴樓屋上覺而生君暨就外傳日記
千言不忘年十三卽能詩與文伯兄知州君侃於寺
中見其詩謂太傅公曰吾家能詩者此人也太傅公
喜乃遣從谿田馬先生受胡氏春秋提學秦君文深
器許之令補州學生己卯鄉試提學大復何子景明
試竣西歸語予曰關中士吾得二人隴州閻倬延安
董珊子幸識之後關中稱名士者必二子也是科二
子果中高等予由是切慕二君之才君第後則不棄
予過則必訪繾綣數日始歸予以其文采肖考功温
雅肖太傅士大夫或以予爲知人後君登嘉靖己丑
進士除知聞喜縣豈弟之政冰蘖之操吏民感畏至
不忍欺暇則課士勸學科貢不置君之教也一時撫

按旌賢舉最不可勝數乙未轉戶部主事民拔轅不
忍去乃立碑頌德以東漢陳太邱內黃張問行武功
李朝綱與君題爲四君子可以知其政矣在戶部分
理通州倉出納詳慎丙申總理三河大壩草場摧督
伸縮悉有條理歲餘所起至十餘萬却稟餼慎獄訟
三河人愛戴歌誦至不容口閑則日課一詩皆清新
爾雅得詩人之意大復之許詎弗信哉值上郊社禮
成推恩臣下贈太傅公光祿大夫柱國太子太傅兵
部尚書袁夫人一品太夫人丁酉督餉固原事竣歸
省太夫人遭疾具疏養病允之明年己亥三月辛未
竟不起矣於戲痛哉君世之懿寶也關中文獻子方
望君將實懸表以振厥衰乃若此天且胡以生君又
且胡以弗壽於君豈天亦無奈於數而鬼神妬而奪
之邪抑如李賀冀修文於天天受而闕之邪於戲痛
哉君生治甲寅五月五日壬寅享年纔四十有六
爾配劉氏布政使顯之女也封安人生男子二人館
州學生娶予弟貢士淳女次錚未聘女子四人長嫁
雲南叅議郭田子生員中玉次嫁戶部郎中邵伯宗
子舉人景次聘引禮舍人張珊子某次出育於房氏
妹孫男女各一人俱幼君有遺詩二卷子將序而刻

之君可以不死矣是年冬十一月九日壬寅鎬等將
葬君於太傅公墓側介其女弟夫景出君姪鏹所具
狀請予銘其墓石子知君者且又重以姻契義不可
辭銘曰窈窕惟閭關隴所瞻鳳起子紹何用弗炊晚
彼科甲其易若探玉謝是金韋杜豈參繫君之才中
壽而鈐大用弗究視后則兼祔葬考側永叶我古遺
德不泯遺詩可耽徵懿考實世萬斯幽

明封承德郎刑部主事張公墓志銘

公諱通字大亨家世長安杜陵人也上世譜失無徵
祖張大公生張二公張二公生公兄弟四人而公長
焉公生而秉德寡言笑不逐羣戲十五能通大學大
義張二公蓋異之令就學泊家道少衰乃令就賈二
公曰有子如此弗能令振且遠豈非命邪豈非命邪
賈不數年其足跡已徧天下而諸關中言賈者皆出
公下矣然公性憚厚利而僅取足曰苟可以給日用
則生道所關如是而已夫何以厚爲哉此其意慮豈
庸人所能識哉成化乙巳關中大飢人相食也公諸
弟方在襁褓而二公又不解作業公曰家無餘積而
丁此大難親且老矣吾何以坐承其變於是轉糶襄
漢手足皆疲而家具溫飽二公謂公曰備穀防旱養

子防飢今於汝驗之矣遂泣數行下公亦數行下洎
諸弟長成教令有立娶令有家二公又泣語公曰此
諸兒我生之汝成之諸兒不忘汝吾將瞑目無悔矣
故今關中稱孝友者獨先公焉蓋其誠意惻怛出於
天性如此云公娶高氏生男子二長治道甲戌進士
初爲長垣知縣有駿聲遷刑部主事娶田氏繼娶陳
氏次治化娶安氏一女子未聘天孫男子二人其苗
裔漸以盛矣公生天順戊寅七月戊子卒嘉靖癸未
五月己酉春秋六十有六明年甲申某月日將葬公
於曲江新阡治道衰經奉狀來請予爲銘予有居在
長安書院坊蓋與刑部居甚邇從長老聞公行實與
狀無少異公心雖孝友而天性剛毅正直與人交一
本公道無所私曲人有過能面道之構者解失者復
得容接者人人自以爲喜此殆有古先長者之意焉
刑部君曰正德丙子先人以先祖命視予長垣居無
何一日方據案食忽棄筯太息曰吾心弗寧如此必
吾親有弗安者卽命駕過歸適先祖母病居十一日
而先祖母卒四月而先祖亦卒身在數千里外而喘
息呼吸與親無間非心之篤孝何以感應神速若此
於戲難矣哉嘗謂刑部君曰吾家世業農畝至汝方

以進士取官吾宗顯矣汝何以自爲哉又曰世自先
曾以上皆無可考汝尚勵之此其微義大旨與司馬
父子相告語者何異今刑部君操德砥行名實昭迥
抗節超邁非公之所教耶當時舉重其文采予猶以
爲未故心敬好之弗專言焉於是爲之銘曰維大亨
父蓄光不發留待厥子顯名方夏實承廼求以肇後
始若彼巨匯先邃而微故至無紀高官膺仕世所共
尊義或弗齒故君子疾沒世而名弗稱千秋萬歲高
岸爲谷况此浮榮若大亨父下有厥子其道豈窮曲
江之阡峩峩屹屹子孫瞻哉可以永終

明故贈文林郎江西道監察御史李公太孺人

彭氏合葬墓志銘

公諱文厚字尚賢武功世族也曾祖永祖聰皆鄉之
長者聰娶某氏生公一人公幼有志於大人之學值
家貧不果長而謹厚與物無忤配彭氏長者端之第
三女也生二男子長曰鳳次曰朝綱朝綱資性穎敏
公曰興吾宗者其朝綱乎命習蔡氏尚書正德丙子
中陝西鄉試高等明年試禮部不第以乙榜拜陽曲
教諭或勸之曰父命也陽曲二年爲正德己卯正月
公卒於家由生景泰甲戌享年六十有六公卒六年

鳳亦卒朝綱免喪拜章邱教諭未幾陞聞喜知縣被
選爲江西道監察御史此嘉靖庚寅事也值上上兩
宮徽號禮成推恩臣下贈公爲文林郎江西道監察
御史封彭氏爲太孺人又三年朝綱知青州府乃奉
太孺人於青州越二年丁酉十一月某日太孺人卒
於青州由生景泰甲戌享年八十又四明年正月朝
綱奉太孺人之柩還武功明年己亥四月十有一日
葬太孺人於東原先塋合公之窆以子有姻契屬子
銘其墓石予惟公淳德休風克承先世是以篤生令
子備法從守明郡使士大夫傳芬播美以及無窮而
太孺人事舅姑勤紡績又有以承公之志植善萃祥
享厥榮養生榮死哀諸福備矣尚何憾哉太孺人生
二女子一適孟文達一適楊仕化五孫男子九式生
員九疇業農九山九川九叙俱就外傳五孫女子已
嫁及聘者四人未聘者一人牛大福與子甥生員習
方楊河楊長史子文光婿也其名隆慶與真定者爲
二曾孫男幼在室者爲二曾孫女予女孫馬常則聘
其長者苗裔繁矣銘曰猗與武功族惟李氏往代孔
揚入明中已涵蘊旣久必開厥美封君昌休其後光
只旣光且繁奚福不几東原之阡伉儷偕止豐碑若

林其自今始我銘在石告厥孫子

明故登仕郎永壽王教授張君墓志銘

君諱儒珍字待聘別號東田居士上世固始人也元固始人被遷入關中七世祖盛兄弟五六人與俱來而盛占籍武功興城里盛生汝周文獻文獻生好禮好禮生敬爲君曾祖配馬氏文簡公姊也生海配侯氏生讓配程氏生三子長翺次士廉季卽君君生而孝友慈祥謹恪幼卽嗜學十八充縣學成化甲辰關中飢人相食乃與其兄奉其父母就食漢中洋縣凡衣食之奉百方匍匐親志用安不知其爲流離也一日自傍邑歸獨行山中幾百里許杳無人烟而饑憊已甚忽雲霾四合咫尺不辨君坐石上自分必死矣頃雲開見岩下有王瓜蔓數瓜纍然取噉之饑憊若失此孝感也居洋一年母卒君哀毀骨立洋之士人稱說其孝若不容口明年兄某奉其父歸又一年則聞父病劇君不辨衣糧不辭主人乃宵夜行至家不知足之重胼也居數日而父卒哭泣之哀遠近嗟歎治已西獨行至洋具小棺負母骨歸合葬於父每所至設香案雖簞食豆羹必祭而後食則跪告曰今日將適某處其孝有如此者傳記所稱殆何加焉君

讀書有大志累舉不利正德戊寅以歲貢拜河間縣
學訓導又八年陞南皮縣學教諭所在以忠信教人
雖豪生俠士亦服其教無敢易者彬彬之士懷若父
母傳曰恭儉豈可以聲音笑貌爲哉如君者非其人
耶嘉靖癸巳陞永壽王教授王以爲長者殊禮敬之
明年九月二十七日庚寅卒於官王重悲悼以爲失
吾良傳君生天順壬午五月三日丁酉享年七十有
三娶予叔姊生六男子鑄鑰鉉鎬鑄鍊皆縣學生而
鉉鎬先君卒鑄鍊戊子同科舉人孫男子七人孫女
子七人其允繁矣今年乙未三月二十二日壬午鑄
等將葬君於鳳岡之麓新兆請予銘君之墓於戲君
與予同筆硯者十有餘年言必及義戲不抵諛至於
俱老且死未嘗有芥蒂弗合者亡友鳳麓符生嘗曰
友道廢壞已久若東田子獨何人邪君孝友之心出
於天授違親已久思念不忘諸甥言君在官見佳果
羹食未嘗不以享不逮親爲言予獨諒焉關中之饑
餓殍盈野君曰吾族寧無殍乎乃以俸金寄極貧者
會極貧者絕粒已數日矣得寄卽能延及麥成故其
族獨無殍者君之孝友所及也君有才賢之子對客
畧無一言南皮張東之憲使清修之士也每以君不

譽子爲士大夫之奇操予深韙之銘曰東田隆隆何
福不豐帝監厥孝錫此令終維德覃厚履則斯宏旣
昇賢子開廣厥宗益以多孫我張用崇振振翼翼允
逖休風鳳岡之麓厥土維融我言卜之作子幽宮後
人克承茲封靡窮猗千萬年光我秦雍

承德郎刑部主事東希孟墓志銘

君諱野字希孟上世鞏昌人也高祖良元季守商州
兵亂居華州子孫世爲華州人良生驥驥生昇昇生
思中有性行舉進士累官中議大夫贊治尹四川按
察司副使夫人薛氏生男子五人周魯漢郊野皆命

治蔡沈書傳辟進士魯漢先舉於鄉君尚少也乃卒

出遂連舉進士明年 治癸亥除知陳留縣陳留道

衝役繁民貧弊不能堪也君至一一更整約束恭已
儉費使爲民先又信賞集事疏導教化使清訟獄亡
厯喧私鬪也其故爲盜掠者以無培斂能安生也往
往變更爲良人凡所以伸縮者道路傳之皆長者然
性善惡惡人及豪逆不法故往往見犯者皆務盡法
亡所舒緩焉河南撫按及布按重臣皆器重之凡所
編籍及訟獄之事其最難者故亡不以委君君至果
一一有度理一時尹縣者莫能或之先也正德丁卯

吏部舉縣職以君年少佚資也但以刑部主事在刑部人皆曰不媿其先人蓋其先人按察公故爲刑部郎中有平聞於今不窮也冬十月提獄禁至十一月朔歸歸卽中寒又十四日乃不起今年纔二十又六於乎惜也已矣昔希孟言自兵燹來百十年北方第子皆無書籍故陳留置書籍數十百種其有閒暇率弟子至躬自課亡日政靡不能矣使假之以年而益自宏肆向裏雖古人曷媿也於乎乃不然也卒之三日給事段君世高書狀來請爲銘後二十日兄魯漢以試至則又請矣夫希孟性行純美其數修短如此然視刻削近名者宜何以終焉嗚呼痛哉已矣希孟娶王氏已封爲孺人子一命曰願壽甫一歲卒後二日又生女願壽神彩瑩澈宜有子矣銘曰年非修也而已終也官非卑也而已通也德非次也而已窮也嗟嗟何也嗣有其子亡可熒也

明故霑化縣儒學教諭趙公墓志銘

公諱玉字汝石其始祖曰公用子孫第稱曰南京公云蓋自元之盛日趙氏在南屬近者徙西北時公用尚幼而孤至其寡姑與俱徙平涼遂占籍爲平涼人然不知爲趙氏何屬也杭在宋爲南京其曰南京公

可占其苗裔矣公用娶張氏生佳兒佳兒洪武三年
置府城東門坡下宅與弟其居佳兒生得名得名生
榮榮生子祥福正祥子常安弱冠當婚逃去爲道士
居秦嶽山中獵者每見兩虎倚其廬升木訊焉曰山
居與野獸相狎無他也福以國子生爲平谷縣丞取
楊氏生公幼卽莊敬嗜學外舅考功員外郎靈臺史
公書奇之於是以其長女議婚云成化甲辰關中饑
甚公時從外舅遊學京師亟以粧奩歸平谷云易粟
救荒外舅語諸縉紳咸嘉歎焉公以偉才積學凡六
試場屋輒不第正德丁卯平谷公卒公旣終喪恨不
能成父之志應貢上京師途得金襴甚巨息樹下以
待其至至與之至以什一謝公公馳去不顧死試後
拜元城訓導值惡教諭伐號房戶牖及文廟樹以營
督求諸生公唯日坐齋課諸生經書惡教諭愈甚
公公不爲意也遷霑化教諭凡諸生所餽贈皆簞
受嘉靖己丑致仕歸環堵敝廬蔬食飲水其意篤
樂也丁酉二月二十四日癸酉公不起矣生天順三
未九月二十三日己卯春秋七十有五公初娶史氏
生子時元有孫三人守約守敬守業及孫女一早
繼娶范氏未舉子而卒繼又娶許氏生子時春及女

子一人爲生員張雲龍妻側室王氏生子時泰及一
女子尚幼初時春以已巳歲生公語諸親友曰此兒
有異須吾得學官祿力教之以成吾父之志故有元
城之行後至霑化時春愈益開悟公日以談笑飲酒
爲樂壬午時春年十四漁石唐公虞佐石岡蔡公承
之爲予道其才美若不容口然但舉鄉試第三人予
私憤焉丙戌會試乃舉第一改庶吉士讀中秘書出
館授刑部主事庚寅上封事罷主事歸光大之業方
正之氣海內推焉公可謂有子矣夫比公漢章遺命
猶存終少殮勿停柩如告也

墓石茲將以月日葬公南山文原時春以狀來請銘
從公志也公之盛德雅操備在家集不可枚舉有子
如刑部終無弗傳者矣銘曰世有哲人必昌厥後其
昌伊何匪祿匪富令聞不忘厥履允厚厥履允厚萬
祀所崇若彼茂草奚其爲容於惟先生逝哉鉅宗邇
流循源有倬其洪公需我銘愧無闡衷佳城巍巍令
子所封孝子不替斯公令終

明故封文林郎雲南道監察御史儒學訓導楊

公墓志銘

公諱舟字濟川別號訥菴家世武功人也曾祖禮國

初舉人才引疾不就祖安父鑑俱孝翁力田爲鄉善人鑑生四子長善次鼎次哲季公

公下當有哲字

爲縣學生

讀書不成父命公繼哲爲學生治朱氏易藉然有名於時成化丁酉鄉試已中式錄其文矣有某參議欲私其門客乃抵落公卷此後累試皆弗售士論惜焉

治庚戌應貢上禮部拜夏縣儒學訓導勤以教人禮以自御夏人至今猶誦說不忘云九載滿年尚未及六旬且將陞官也乃幡然告歸家無厚蓄守薄田數十畝其心休休若將終身焉此可以占識公志矣

正德辛未長子秉中第進士爲行人又三年爲御史

勅封公爲文林郎雲南道監察御史配張氏封爲太

孺人太孺人鄉善人貴女也年二十歸於公善執婦道勤儉備至故能相成公學公已有官乃彌喜紡織所衣裙布敝猶不易曰我性蓋如是正德辛巳十一月八日公以疾卒於家繇生正統庚申三月二日春秋蓋八十有二葬後四年嘉靖丙戌六月二日孺人亦卒繇生正統壬戌六月二十八日春秋蓋八十有五今年戊子九月三日秉中將奉孺人之柩啟壙附葬於公以狀授海請以銘公之墓海自兒童時嘗從鄉先生之後私識公之行事公天性孝友加以稟賦

謹厚終其身鄉黨宗族咸無閒言兩兄繼歿撫其遺孤無異所出堂叔某死無後葬之以禮又爲主時祀於家秉中旣貴祿之所入計已饒裕公欲然如布衣時顧自處益儉每飲食至輒以先公先夫人逝不及養感泣不已此亦可以謂有終身之慕矣張孺人性尤儉素遺訓甚多秉中嘗述以告予曰不肖爲御史曾拜吾母於堂記吾母之言曰我在家時聞人說而祖善而父將來必做官人我歸而父見而祖接人若恐傷乃而父果做官爾官視而父又加顯矣此而父之善所致也而謹識之凡百勿顧目前當從後看可也不肖攜家口北上吾母告吾妻曰我平日過活甚難今老矣一薪一米未忍輕費世常說節儉勝求人諸婦宜深念此日用汝輩不愛惜累及吾兒請勿復來見我也此皆表表然可以訓及將來比跡古之賢母者噫嘻盛哉公與孺人生男子二人秉中允中秉中以御史陞山西按察司副使允中受義民爵女子一人適里人党厚孫男子八人詡早夭餘三尚幼秉中出也純紀俱縣學生而紀夭餘二幼允中出也孫女子三人秉中所出二一適重慶檢校王堂一許聘景塾允中所出一適馬河龍俱先歿純出曾孫女

對山文集 卷之七
子一人已許聘馬氏苗裔盛矣方公卒時秉中以巡
按四川過家孺人卒時秉中已陞官山西歸省問疾
侍藥屬壙視窆曾無一之不逮所謂不期然而然者
非公與孺人陰德宿厚詎有此哉銘曰武功之南厥
川惟廕土厚水深公墳俛俛孺人是同奠茲終古名
德在時懿訓如睹子孫振振克遵伊武伊武孔賢帝
命是延豐章蔚誦胥貴公阡南山峩峩漆水煎煎永
言孝思尚慎諦旃

故文林郎知吳橋縣王君墓志銘

治初關中蓋有才子焉言出而文成筆挺而思運
諸關中英俊之士莫不以爲難能望望焉不敢與之
抗見其文觀其誦述目動口嚅心服志赧者十恆八
九吁亦奇矣予自弱冠與之爲友顧其天資之美雖
傳記所稱何以過也乃今卒不能以行見於世忽焉
卒矣悲夫天之生才也付之以美大純粹之資而又
畀其所就使之與物同腐顧非斯人之不幸哉此吾
友野堂王君仁瑞之卒茲予有以傷士之不辰而感
時日之易邁也於戲仁瑞之資豈世之所恆有邪昔
馬遷讀服鳥賦深與其同死生輕去就爽然自失仁
瑞以名進士試圻縣其欲爲之志橫博之氣至欲與

宇漢爭高及其退居林麓澹焉脫焉若亡若寄茲亦
非綽有餘覲者乎按狀仁瑞姓王氏諱麒上世寶雞
人也自祖某以來率居鳳翔仁瑞生七歲父琰令就
學卽若成人年十三四殊爲知府張公本濟所愛曰
使其讀書不輟不數年天下無書矣後果中治乙
卯鄉試己未進士辛酉除知吳橋能以法令飭治民
敬畏之不三年爲州守註罷歸鳳翔年尚銳也卽脫
棄其事日徜徉里閭奕棋賦詩若將終身客至不拘
有無必置酒欵洽雅歌投壺晏如也嘉靖癸未母夫
人焦氏卒哀毀成疾延及今年戊子二月二十二日
甲子遂不起繇生天順癸未五月九日丁酉春秋六
十有六先娶劉氏郡名家女善執婦道先君十五年
卒懿德在君之自志生男子一人曰元定女子一人
嫁國子監生扶風趙惟珍繼娶李氏鳳翔守禦千戶
所鎮撫憲之姊也德似於劉先君七日亦卒生成化
乙未十一月二十三日戊辰得年五十有四元定將
以九月十六日乙酉合葬君與李孺人於城南劉孺
人之壙以予知君爲深當銘君之墓石因以所記於
君者道之若夫吳橋人士感德懷惠繪圖立傳諸事
則吳橋志與士大夫所誦說者人人知之予不欲贅

望山文集 卷之七
君卒時有孫男子四人孫女子一人苗裔盛矣銘曰
氣凌九有而位不逮心雄萬古而業未竟豈人履之
靡諧抑天數之有定雍城之南地佳且正子孫振振
纘君之慶享不酬德爾後則競銘以告哀予言匪佞

亡妻安人尚氏墓志銘

安人者故順天推官尚公第二女也母曰賈夫人成
化乙未九月二十八日甲戌生安人重厚嚴格不必
其長知非凡女子矣昔先君子爲予擇婚者數年無
一當者乃後得安人 治壬子先君子卒又三年乙
卯安人歸予伉儷二十六年而安人卒焉雖其數有
不可得而易者然奚至於予而數遽如此也於戲痛
哉安人歸予時年已二十一歲貞靜恭儉有君子之
德其裁制事爲動與義合氣岸凜然烈丈夫或弗如
也妯娌姻婭見安人莫不畏且敬者蓋其意度自能
奪人如此也先夫人嘗曰新婦事我克盡孝道且今
二十年母一懈也正德戊辰先夫人寢疾安人晝夜
不寐者十有七日洎卒號泣幾隕凡人之婦孰不能
此者而因心惻怛則安人一人爾於戲痛哉方子舉
進士第一人莫不喜也安人曰道以無垢爲貞名以
陵實是懼保貞克懼此君子所以進德修業欲及時

者也尚何言喜邪此其意可與淺見薄識者道邪予
歸葬先夫人之三年庚午淡瑾伏誅言官論予爲編
氓報至安人撫掌曰不垢得垢是謂罔謬而今而後
夫子蓋卒無垢矣非大慶邪省耕視饁黽勉作業由
庚午至庚辰十有一年口食瑣瑣無弗給者所以使
予放情邱壑鮮復顧慮秋毫皆安人之力也於戲痛
哉安人自初及今事無鉅細未有不自請予而徑行
者其恭和弗專亦可見矣卒之日家人婦子號慟罔
極若喪所生所立家則歿已三年而率行如在其宜
夫克家蓋予之韋弦也何不幸不能與之窮年同蹙
豈造物者不使人兼熾金嘉如此也於戲痛哉安人
所生男女十人其六人皆早夭今止有男子一曰棗
女子三長嫁舉人張之槩次嫁李世貞季嫁馬襲吉
皆生員也嘉靖二年四月二日癸酉將葬安人於潞
西先塋兒子棗曰大人盍銘諸石以志母安人之壙
夫安人之美衆矣人不能詳言者具已載諸家乘不
欲繁爲辭說銘曰潞西之崗巒崑崎嶇唐山是名爰
自我祖返貞歸始肇啟茲宇左漆右雍前渭後岐地
臧孔宜非德孰居汝年弗豐汝道則隆篤順克孝秉
素蘊貞我宗用崇千歲一瞬若旦暨夕詎弗汝齊汝

復何疑我行弗磷汝名乃偕汝茲休哉

文林郎湯陰縣知縣侯君墓志銘

君諱相字良弼上世故武功人也曾祖某生某某生
恕有德不仕舉爲鄉飲賓娶李氏生男子三人君蓋
中子也少穎異落脫不拘小行年二十予先君平陽
公見之謂君叔蒙城丞清曰此兒神清氣美何不令
之學後侯氏有能亢宗述德者此兒也故遂從爲縣
學諸生 治己酉果舉鄉試高等明年試禮部不第
以乙榜爲蒲州學正學正九年再試禮部不第尋有
外艱除服上吏部拜湯陰知縣湯陰邑衝要民貧實
苦徵役號煩難理君慨然往之曰不能宰是邑書可
廢也居一年吏就典列民信軌訓湯陰稱治平矣然
性喜肆遂不通時宜遇尊官上吏則執禮爲敬不若
世俗奔走卑屈往往爲所損詬雖小事必欲合其約
東卽尊官上吏不能移未幾有內艱歸明年遂以朝
覲考察閑任人以君英爽有氣年又壯健未老也君
歎之曰嗟乎世人重爲官予重使氣吾欲不失已而
官職乃使之是重官不重己非吾志也縣南有橫渠
綠野書院因兒時嘗牧其野遂自號綠野牧子樂然
於家凡十又一年以病腫卒時則正德七年壬申閏

五月十又六日己巳也由生景泰丙子三月二十日
己丑春秋蓋五十又七云君易簣時托符尚玉來請
予與語予至則君已漸矣君弟右指予謂君曰爲誰
君曰對山先生也或謂君將有所托君搖首不應予
恐其終而亂也因語之以順生安死之說君勉強爲
數言曰卽何不知死爲吾歸子之賢不肖在天豈敢
累故人所覲故人者銘我墓石使後世知有我云云
爾又釋倚者手向予揖而止予頷君意歸且未出戶
而君絕矣蓋予昔未第時君獨重予文謂可名世及
病又數數以銘石見托乃至其大故猶不能忘此其
心志所隱蓋何如哉君體頤面豐多髯善戲謔而喜
飲無擇於鄉人故鄉人無大小皆樂與君遊君爲學
生時有文名及爲學正湖廣河南皆聘爲考試官稱
得士云性服善喜德人有片長卽稱之不置居官克
自砥礪欲爲循良不知上吏之不可其意卒至貧厄
不裕然能慷慨靡撓蔬食豆羹晏如也配張氏側室
王氏生男子一人宗史今爲縣學生娶長安楊教諭
從禮女女子二人長嫁楊玠次嫁鄧際隆孫男子一
人圭尚幼在襁褓明年癸酉十一月甲申葬新寨先
塋之次禮也銘曰貞而咎惟眊爾後惟爾不回爾光

則恢我石孔文惟永翼爾墳

劉母恭人高氏墓志銘

恭人中部人萊陽知縣高秉第二女也中部稱望族者恆曰劉高然萊陽君與劉氏生員君準同遊中部學氣誼甚厚遂相與約爲婚姻故以恭人妻生員君子封彰德知府焉當其配時生員君已逝久母折夫人再適鄆州王氏封君以四歲遺孤折夫人保育至成立始克還中部及還則家事已狼狽遂求爲縣吏云時鄆州王叟亦故折夫人復來依封君恭人左右奉養曲盡孝道折夫人喜曰婦如此我無以報婦願婦多賢子孫勿若吾兒孤也天順甲申封君吏滿上京師恭人從之紡績易米以爲食者凡十年後封君爲保安州洗馬林倉大使爲亳縣義門巡檢凡百家事由恭人頗致饒裕矣恭人性嚴正有法所生男子皆教導以禮故皆成名人聞於世云左僉都御史聰者恭人申子也曩嘗告子曰聰實不肖凡聰有今日皆老母力曩聰從家君居京師就學衢舍中方甚貧約母手自勤苦得少貲卽以助學費一日母從下馬牌過見珠冠霞帔者問家君曰此命婦非貴人妻則貴人母母因指聰曰若能爲我辦耶以此聰益奮志

向學後爲鄉縣學生自謂科第可立致及試甲午不第少驕怠矣則或有所閑肆母聞輒杖之聰性喜奕棋嘗與寇生奕母至杖背罵曰秀才事是如此幹寇生感悟與聰俱力學後寇生學亦底成曰此固劉母之賜也母善料能審家事大小無有不申者甲辰乙巳歲大凶人相食父子不相顧母與家君言今日不令子姪雖奴僕工作皆要保全一僕有私財者欲出自居母曰爾所蓄不能當此年輕去恐不免餓死不聽卒餓死聰舉丁未進士治己酉除太平推官時家君已在亳未幾家君官滿過太平母再留二年朝夕惟以明刑毋罔爲戒後有命封家君太平推官母孺人矣又後以聰知彰德又封家君彰德知府母恭人安享祿養者二十餘年益豐備矣乃益儉約戒諭如貧賤時云一時縉紳大夫聞者莫不歎息敬服傳母之能教也予往過彰德與王子敬夫蓋親見之敬夫曰有此母安得無此子孫敬夫者前翰林檢討九思也知人能論故予記其語如此云此可以徵恭人德容之盛矣今年甲戌三月丙子無病卒於家生宣德丁未二月丙寅壽蓋八十八云男子三人攻早卒聰官如前璋順天舉人女子一人鄜州王舉妻孫男

子十二人伸縣學生儀偉國學生玫出佐辛未進士
戶部主事儼國學生侃舉人信縣學生仁舉人聰出
仕縣學生价倬儒璋出孫女子八人嫁者三人宋溥
張元傑馬鏞其婿也皆士人妻聘者三人宋氏與洛
川王氏鄜州學生王文禴氏其二尚幼未聘曾孫男
子九人曾孫女子七人其子孫統四十八人云於乎此
豈世嘗有也某年某月某日葬新河口梨園村鏞子
坪新塋都憲公以狀來請予銘其墓石銘曰坪之廣
兮可以藏德坪之潤兮可以延澤乾向巽兮剛柔節
子孫世萬兮惟坪斯宅靈爾康兮永無極

庚午解元吉原靜墓志銘

原靜諱體仁姓吉氏馬嵬世家也高祖某曾祖某祖
贊父友文皆世有懿德富而好禮馬嵬人重之友文
娶張氏生原靜幼敏悟不凡讀書輒旁求指趣作為
文辭豐贍有氣識者恒以魁解許之從谿田先生治
春秋隨試庚午果中鄉試第一主司以為稱任累試
禮部不第益更自勵以求必舉及乙未又不第原靜
曰吾倦矣予黃山之下有泉可濯有田可耕安能役
役自苦盍歸乎來課子蒔藥以終天年比歸寢疾十
餘日而卒臨卒索紙筆書七言律一首投筆而絕英

邁之氣超捷之才不以將死少餒非養之有素能若是邪於戲可惜也已由生成化甲辰十月三日丁巳至嘉靖乙未四月二十四日甲寅享年蓋五十有二於戲原靜事親孝教子嚴內外有則舉措率禮予殊嘉其爲人方謂可以大受乃至如此斯非數邪配劉氏興平名家女生男子五人長來逢守家人業次來獻來朝皆廩膳生次來旬方進未艾女子四人長許聘予姪餘幼其一則側室某氏所出孫男子二人曰順曰換梁孫女子三人俱幼是年七月二日辛酉將葬原靜於北原新兆來朝來以予銘其墓石銘曰英邁之氣琦瑰之才位旣不逮命復罹災於天謂何胡寧弗哀美名雋操終古是瓌從以令子胡德之衰此原窳窳永奠元臺刻石啟後用覲厥來

邑後學 張廷梅與松 校字
孫 燮午卿

<p>...</p>	<p>...</p>	<p>...</p>	<p>...</p>	<p>...</p>	<p>...</p>
------------	------------	------------	------------	------------	------------

呂翁學

魏武碑與德

外字

